

Žane dalje wsy za brunicu njewoprować

Drježdźany (cry/SN). Přesydlenje Mulkec a Rownoho je z blida. Wulkotne. Njepilic statok móže wostać. Hnydom pódlu w Miłorazu pak dže wo eksistencu. Tohodla informowachu wčera zastupnicy Serbskeho sejma a wobswětoškitneho zwjazka BUND Sakska zajimowanych zastupnikow krajneje nowinarskeje konferency w Drježdźanach wo aktualnym položanju. Hinak hač so stajnje zaso twjerdži, njeje wěro, zo so wšitcy wobydlerjo hladajo na plany přesydljenja wjesela. Někotři chcedža wostać a tole tež wótře wupraja. Wsy wotbagrować za fosilnu energiju, je to hišće načasne? Wažna to tema w Serbskim sejmje, wšako njebuchu Serbja dotal prašani, što ma so z jich domiznu stać. Wjace hač 80 wsow je so hižo zhubilo. Renaturěrowana krajina je jenož słaby tróšt za rany Łužicy. Člon Serbskeho sejma Tomaš Čornak fakty znaje. Wón nowinarjow prosy: Pisajće wo wěrošći: Wodu nam wotklumpaja, štomy zahinu, ludžo, kotřiž chcedža wostać, su zrudni. „Nichtó njekritizuje tych, kotřiž chcedža so přesydljeć“, rjekny Hagen Domaschke, zamołwity za zjawnostne džěło Serbskeho sejma. Wopušćene domy pak dyrbjeli stejo wostać, te móhli raz druzy wužiwać. Serbski sejm chcył zajimy Serbow w potrjehenej kónčinje zastupować.

Krajny jednaćel BUND Sakska dr. David Greve něhdže 20 zastupnikow wšelakich medijow wo tym informowaše, zo móhli Miłoraz zachować, bjez toho, zo hórnicy swoje džěło zhubja. Tak móhli mnóstwo wudobywaneje brunicy zaměrnje znižić. Tak wuhlo hišće dołho dosaha. Sakski krajny sejm měł prawje bórže wobzamknyć, zo hižo dlěje njeplanuja, brunicowe jamy rozšěrjeć.